

四庫全書

經部

欽定四庫全書

四書近指卷八

容城孫奇逢撰

子罕第九

子罕言利章

夫子痛黜世之言利曰喻於利放於利深望人之安命曰不知命不受命利與命固嘗言之矣至於仁孔子之所以立教也志仁好仁安仁利仁依仁不違仁不一而

足豈孔子以立教其徒日侍而不知蓋其記言之頃各有相對之情以為立論之地或終日言之而猶疑於無言豈真無言哉罕言不語雅言皆至教也要看的活

達巷黨人章

大哉無所成名但博學二字黨人或以技能疑夫子故夫子姑以射御較言之亦無容深說也

麻冕禮也章

儉而無害於禮何妨於從若泰則破禮害義大節攸關

何妨違衆以獨行一從一違原非單拔學問而違衆二字俱見持世風骨 饒雙峰曰此聖人處事之權衡所謂君子以同而異

毋意毋必章

意必固我乃有心人之所以托於世以自見而賢者則必欲克治之滅於東而生於西四者有一焉皆所以累心也惟聖人心與太虛同體故於四者絕之盡物來順應不費一毫安排人見為人也純乎天而人不與一天

之道也

子畏於匡章

夫子以斯文自任正以文為天之所授天之所授人惡得而奪之非矜天以為重循理而已矣此與桓魋章同一學術 胡雲峯曰文不在茲之文即文王之所以為文也文王接堯舜禹湯之統夫子接文王之統皆天也紂能囚文王不能違天而害文王匡人能圍夫子不能違天而害夫子

夫子聖者章

吾道一以貫之一則不多多則不貫君子多乎哉不多也此是聖學宗傳太宰以多能為聖人之事子貢以多能為聖人之餘事夫子直以多能為少賤鄙事則道之不貴于多也明矣

吾有知乎章

所惡於知者為其鑿也只是騁聰明意見於竒炫能自為多事夫子既不多能原自無知第就其問者而叩之

使他天機自動在我不必添設在彼可以意解矣此之謂行所無事 張氏曰叩其兩端其字指鄙夫說正見其因物付物之妙知從鄙夫出而我無與也道理原自如此

鳳鳥不至章

吾已矣夫熱心欲冷無限淒涼 孔子所謂不至不出者非欲恃此為符瑞也生平愼想羲文之盛而不可得故發此嘆耳

子見齊衰章

必作必趨是何等心腸看聖人微處全在人所忽處
張芑山曰此亦見聖人動容周旋中禮處凡應事接物
皆然記者特偶記此數事耳

仰之彌高章

高堅前後見聖道變化無窮莫可端倪及得善誘乃知
用無方而體有定功力自不肯泛用卓爾之立自非復
高堅前後之見矣欲從末由顏子平生可用之力盡於

此而無可用力中工夫更細正要從循循善誘涵養於此謂善學孔子 郝京山曰約禮只是主敬蓋以敬履事之謂禮以禮操心之謂敬儒道就世間綱紀倫物上著脚故由禮入

門人為臣章

生順沒寧非大聖人不能夫子嘗為大夫為臣豈遂為行詐第既以去位義不容苟安君道師道各有攸宜不可行之於君者何不可行之于師死於臣之手不順則

不寧死於二三子之手順矣而何不寧也此纔是到頭
學問

有美玉於章

待字較求字有多少身分在伊之莘野太公之海濱武
侯之南陽皆藏而待焉者也 一待字正是行藏的樞
軸未嘗不沽未嘗不藏廟堂亦藏山林亦沽此便可想
聖人無可無不可

子欲居章

欲居何陋皆一時寄寓感慨之言

自衛反魯章

雅奏於朝頌歌於廟迹熄詩亡之後而夫子正之太和之音復現此學之所以集大成也 功成作樂者周公之事在鐘鼓世衰正樂者孔子之事在簡冊叙雅頌之得所就正樂者言之也 張卓菴曰使用樂者能遵夫子釐正之美則大夫不敢僭諸侯諸侯不敢僭擬天子君臣各盡其道而天下治矣

出事公卿章

此所謂庸德也何有於我行之而不敢不勉之意下學
上達正在斯 李衷一曰事公卿如靖共篤棊事父兄
如祇載克恭勉喪事如曾子問喪大小記不為酒困如
酒誥賓筵此豈易事

子在川上章

文文山云道體流行之妙往來而易見者惟川流為然
聖人發其端倪欲學者體認省察無一息間斷後千數

百年程子始默識而指以教人曰其要只在謹獨聖人
言道之旨學者入道之門於是深切著明

未見好德章

好德不敵好色正見道心微而人心危學者默自體認
莫作自欺欺人之語 許東陽曰此與大學比喻一般
意只是勉人須是好德

譬如為山章

一志於學便終身無歇手之時彼畏難而止者皆退事

者之借說也未成一簣欲止即止誰其沮之雖覆一簣
欲進即進誰其迫之故有人功者無天事全在吾當下
自決 新安陳氏曰語有三四章如詩六義之比此止
言為山而未嘗言為學然為學之意見於言外松柏驥
力苗秀章是也

語之不惰章

顏子得夫子之提撕其機神鼓動自有欲罷不能之意
如何惰得 朱子曰不惰惟於行上見

子謂顏淵章

有進無止即所謂不惰也可想見其好學追思自不能已

苗而不秀章

學未竟其成總是不秀不實之類 張橫渠曰學者只是於理義中求譬如農夫是穠是莠雖有饑饉必有豐年蓋求之則須有所得

後生可畏章

可畏者冀其有聞也到無聞時則虛此可畏矣人知此語為策勵後生愚謂亦不足畏更所以激發老者一息尚存此志不容少懈彼耄而好學者詎可忽諸

法語之言章

進言之道曰法與異聽言之道曰改與繹不改不繹則言之路窮矣末如之何非絕之也正要他改繹處此夫子不倦之誨也

不可奪志章

志之所設必設於死亡貧困欲生者死可奪之欲富者
貧可奪之必之於死亡貧困則天地之權窮帝王之勢
廢矣 梅麻城曰劉禪之庸懦不能少變武侯之鞠躬
盡瘁武壘之汙穢不能灰梁公取日虞淵之心須將不
可奪說得寬然後志字波恬浪靜與氣魄用事者不同

衣敝緼袍章

處有餘而伎處不足而求人情乎不伎不求則善矣然
自以為善又不足為善矣此樂與好禮之所以進於無

諂無驕也學問無窮愈進愈覺其妙夫子冶鑄羣賢多如此

松栢後彫章

勵松栢之操者固不待歲寒後知然閱歲寒而亭亭獨立凡卉敢與之競秀耶有歲寒自不能不借松栢耳學者必周於德謝註宜味 或曰孔子此語正為人無先見徒有事後之悔益感慨繫之宦官敗然後祠楊震祿山反然後祭張九齡皆後矣

知者不惑章

世人盡被惑憂懼三個魔軍縛倒永無脫離之日能降
伏此魔者須得知仁勇之人總是描畫一個心體無累
此乾行不息之學

可與共學章

此學道之階級也須至於權方是到家可與未可與步
步引之使進 胡雲峯曰程子矯漢儒之弊而謂權只
是經朱子謂經與權當有辨無程子之說則權變權術

之說行於世矣無朱子之說則經權之變不復明於世矣先儒謂朱子每於程子之說足其所未盡補其所未圓實有功於程子

唐棣之華章

思無邪一言蔽全經之旨學者但能無邪思思人思理俱無不可語意虛活見只是未曾思那得有遠 此章註云自川上至終篇皆勉人進學不已之辭然其餘何莫非學習中事

鄉黨第十

孔子於鄉章

此章見孔子每事各有至當之則不待安排恰與天則相合鄉黨是做人第一步他日立朝廷交隣國事上接下俱在此植基故記者以鄉黨先之似不能言便便言蓋不露穎於杖履之前而獨伸說於建白之地語默合宜

與下大夫章

合下四章俱是維持魯室事君盡禮之事 四如字見
莫可形容之意 或謂侃侃於上大夫闇闇於下大夫
莫非一道乎曰賢者之有心畢竟不如聖人之無意畏
大人與藐大夫氣象各別 鄒南阜曰與上大夫言有
時侃侃亦是闇闇與下大夫言有時闇闇亦是侃侃須
要識得此意

君召使擯章

一承君命即儼如對君惟恐已之失禮於君即吾君失

禮於隣國被命之初行禮之際禮畢之後一一摹畫成象成文

入公門鞠躬章

此記在朝之容有五一入公門二過位三升堂四下階五復位他人處此亦不得不敬夫子却從容而敬之至八如字兩似字無限形容

執圭鞠躬章

執君命圭以通隣好敬以將禮和以達情著著中節

不以紺緞章

此記衣服之制經緯人事變理天時邪正有辨公私有等表裏有章吉凶有度化裁之妙用也篇中不以字必字宜玩味

必有明衣章

此謹齋之事他人於此多忽聖人必致其敬故明衣寢衣變食遷坐都用必字

食不厭精章

金匱要略卷八
卷八
此記飲食之節食而計養者質食也食而具禮不正不食者文食也數不必字皆是無心自然合節

不正不坐章

有以方為正者如南嚮北嚮以西方為上有以事為正者如有憂者側席而坐有喪者專席而坐一席之微必嚴心無不正也

鄉人飲酒章

此記居鄉之事王道之行也以禮教始禮教之行也以

居鄉始即此二事想見觀於鄉而知王道之易

問人於他章

只是一個真

廢焚子退章

仁民愛物原有差等記者摹得出

正席先嘗章

此記事君之禮無一事無一處不是誠敬之心

朋友死無章

此記交友之義一殯一饋各有攸宜非聖人烏能中節
不尸不容章

此記容貌之變見聖人無一息不與天命相通無一息
不與民命相關無一息不與天下之榮瘁吉凶相周徹
故因不尸不容轉出許多必變來記者直恁有心

正立執綏章

此記升車之容顧者眼之事內顧則眼失容言者口之
事疾言則口失容指者手之事親指則手失容一必字

三不字莫看得等閒

色斯舉矣章

夫子聖之時故記者以此終焉時止而止也山梁雌雉見非鳳儀之時子路又果於忘世者記者真是傳聖人之神 顧涇陽曰仰鑽瞻忽顏子之狀夫子也得其髓矣江漢秋陽曾子之狀夫子也得其骨矣宗廟百官子貢之狀夫子也得其肉矣至鄉黨一篇皮肉骨髓咸在焉活活繪出一個孔子只看人作何理會故曰吾無行

而不與二三子者是丘也 程子曰鄉黨分明畫出一個聖人 朱子曰鄉黨說聖人容色處是以有事時觀聖人說燕居申申天天處是以無事時觀聖人學者須知聖人無時無處而不然 胡雲峯曰鄉黨形容夫子之一動一靜可得而直遂其辭者曰必曰不可得而直遂其辭者曰如曰似其皆隨時變易而非道所在者歟 王弼州曰鄉黨聖人之用也吾無隱乎爾 王浚儀曰聖人毋必而鄉黨言必者十有五記必為之事

也



四書近指卷八

欽定四庫全書

經部
四書近指卷九

詳校官左都御史臣李紱

刑部郎中臣許兆椿覆勘

總校官編修臣王燕緒

校對官中書臣王家賓

謄錄監生臣楊景猷

欽定四庫全書

四書近指卷九

容城孫奇逢撰

先進第十一

先進禮樂章

野人君子時論既定非豪傑之士便不能抵攬流俗先
進之從從周之初也辭君子而就野人嚴去取之辯而
不驚天下之心是夫子持世大學術 問夫子用禮樂

而從先進是欲從質耶抑欲文質之得中耶雙峯饒氏
曰聖人之道無適不中用禮樂而從先進在當時則爲
崇質在理則爲適中

從我陳蔡章

同志相從患難亦是樂地皆不及門無限淒涼四科十
人記一時與難者耳先正云唐虞之際有君臣成周之
盛有父子陳蔡之厄有師弟皆千古奇會 朱子曰
德者行之本君子以成德爲行言德則行在其中德行

是兼內外貫本末全體底物事那三件各是一物見於用者也

回非助我章

回於夫子之言無所不說夫子於回之人無所不說夫子與回真是一個人故每贊之 蔡虛齋曰聖人本意在下旬惟其於吾言無不說故爲非助者也此豈憾之辭

孝哉閔子章

內有以孚於家外有以孚於人非誠身順親者不能况
閔子父母兄弟與他人不同更難能也 恒人之父母
昆弟或有私愛則以輿論爲公閔子之父母昆弟既有
嫗妒則以感格爲難故不曰其父母昆弟不間於人言
而曰人無間於其父母昆弟之言其者微辭也夫子一
言而子騫不失爲孝其父母昆弟亦不失爲慈友

三復白圭章

三復白圭有多少緘默處甚矣謹言之難也聖賢治心

之學全在此處做功夫 林次崖曰謹言則行在其中
是必度其可行者方言不可行者決不言子曰先行其
言而後從之有子曰信近於義皆謹言之事也

季康子問章

好學之人逞矣因問而追述之更覺悽惋

顏淵死四章

連記顏淵死者四千古傷心之慟獨孔子於回爲至極
顏路請車爲椁固父子不容已之情抑微窺夫子喪子

之噫夫人之慟或在所不吝也至門人厚葬豈非仰體
師心友朋中一段高誼然既不予之車又不可其葬總
之禮有所在義有攸歸此際自有一確然不可踰者非
聖人誰能純乎天而不間以人乎 輔慶源曰義之所
可則脫驂以賻舊館人而不吝義所不可則於顏淵之
厚而不從其父爲椁之請此可見聖人處事之權衡
洪氏曰孔顏一體也回何敢死子在故也天喪予回死
故也 家語顏淵之喪既祥顏路饋祥肉於孔子孔子

自出而受之入彈瑟以散情而後乃食之夫子之慟顏淵至矣雖然顏淵祥而夫子將夢奠矣惜哉 蔡虛齋曰厚葬一章書須以曾子易簣事來參看蓋聖賢於道理直是要無纖毫遺憾君子愛人以德意猶末也

問事鬼神章

事人即所以事鬼知生即所以知死此是學問第一關破此關別無難事程註確乎不易 鹿伯順曰人之非即鬼之責故子臣弟友慥慥自盡事人即所以事鬼也

直爲生罔爲死故踐形盡性惺惺嘗言知生即所以知死也

閔子侍側章

行行亦是經陶鍊而成然畢竟有過於剛處故爲他思量究竟 或曰尹氏謂子路有不得其死之理一理字最確聖賢觀人只是論理非別有前知之術也孟子於盆成括亦然

魯爲長府章

魯弱小而奔命於齊晉民力亦過勞矣不憫其前不圖其後知其志之不存民也閔子學有本原其言自是中理新安陳氏曰改作之事經傳不載使因閔子而止則仁人之言其利溥矣閔子本不尚言語而言必有中惟有德者能有言也專事言語者其言未必雍容簡當如此

由也升堂章

子路資質高明未免有性情之過子正欲引其入室也

豈真擯之門外哉警醒之詞不嫌峻厲亦因人下砭妙
用爐錘 要知堂與室相去無多道理精微處亦不在
正大高明之外只陶鎔得淨便是中和地位

問師與商章

無過不及自有一天然恰當之則二子學力俱未貼合
均失之矣子貢意在賢師不知天然之則著不得一毫
聰明才知故曰過猶不及 或曰過猶不及只就過不
及論道理不是就師與商論品地

富於周公章

夫子嘗於季桓子見行可之仕然有微權焉以扶公抑私爲作用冉求則以爲食其食而事其事傾心於季氏不知季愈富而魯愈貧矣擅聖門政事之科者僅如斯而已乎絕而令小子攻之不知求當日何以存活

柴愚參魯曾章

愚魯辟喙是氣質之偏知其偏纔好下手曾以魯得固是脫胎換骨之人如柴如師如由皆聖門錚錚者所藉

師友陶鎔學力變化正自匪淺 張南軒曰愚則專而有所不通魯則質而有所不敏辟則文煩嘖則氣俗此皆其氣稟之偏夫子言之使之因所偏矯勵而擴充也

回也庶乎章

回之屢空嗜欲淡而營求寡故庶乎賜之貨殖營求多而嗜欲深即億中亦才識耳夫子每以回進賜思深哉

張氏曰人多言學者以治生爲首務觀孔子稱回之屢空而不取賜之貨殖則知治生之說終是後人怕餓死

非志士不忘溝壑之義無識見者不知爲治生兩字壞却多少人宜急取孔子此說正之

善人之道章

前言往行凡詩書所留皆迹也而精意即在其中故必藉其途方可入其室善人以不學見長即以此成短顏曾入室之人也全藉學力就善人一時規模說非謂他究竟不能入室

論篤是與章

色莊者之起人敬或較君子而更親故非具眼人莫辨
蔡虛齋曰大凡言說篤實貌亦在其中色莊只是言偽
爲於外者言亦色所在一嘖一笑皆色也

子路問聞章

聖門以力行爲主聞斯行之所以鼓其行也有父兄在
所以善其行也總歸於義而已矣問同答異直是化工
肯物得赤此問足破曲學拘泥之病 芑山曰總是成
就他一個行須知退之亦寓進原只退他兼人不是退

他行也註稟命須活看口曾中明理義審時勢將父兄
作箇準則到行時默加衡量不率爾憑臆妄行耳 京
山曰善行不同有父兄得主者亦有父兄不得主者子
路好勇子曰君子義以爲上此何必問父兄冉有與朋
友之粟五秉有父兄在亦不可直行非謂君子正心修
身皆須稟命父兄也聖教兩端言無典要記曰言非一
端而已各有所合也按此論甚正

子畏於匡章

害仁以偷生者聖賢必不爲子之於匡偶爾相遭萬無可死之理回固知子之在也何敢死自不輕死耳若曰患難之來死生之權可以自操則泥矣 或曰子畏於匡兩見實一事一爲夫子記一爲顏淵記也夫子在圍子路未嘗與匡人鬪豈獨疑顏淵赴鬪而死哉曰吾以女爲死者蓋患難倉卒或有喪亡不測之虞也曰子在回何敢死非白其不鬪之意直是子亡與亡子存與存云爾子曰匡人其如子何知已必不死於匡人也顏淵

曰子在回何敢死知夫子與已必不死於匡人也信夫子亦信已也聖賢死生之際其自信也審矣

季子然問章

大臣風裁可想不從君之欲必行已之志由求豈能無愧色焉據其果與藝原祇具其一端耳由求仕季氏非夫子意中所喜故每有誚讓之言 張南軒曰弑君父不從何必由求而能之曾不知順從之臣始也惟利害之徇而已履霜堅冰之不戒馴習蹉跌以至從人弑逆

者多矣如荀彧劉穆之之徒始從操裕豈遂欲弑逆哉
惟其漸漬順長而勢卒至此耳雖然自弑逆以下苟一
事不道而苟從之皆爲失大臣事君之義如由求未免
遜是也至如他人因循以陷於大惡則由求不至是也

子羔爲宰章

治民事神皆所以爲學未嘗不是然未學而憑治民
事神以爲學在是者則又失之矣殊非子路本意亦非
子羔本色 陳氏曰上古無書可讀天縱首出之人學

天地而已後世聖賢撰述既多行事在書中心術亦在書中學不過欲如聖賢之行事心術耳故讀書居學之半

子路曾皙章

夫子志在用世故於四子侍坐以知爾問三子所言皆用世也點之所對却非所問之旨夫子何以喟然與之蓋三子以有用爲用有用者須有待點以無用爲用無用者固無待也就見在景同見在人行見在事其趣味

寧有窮時此便超脫於三子之外而三子又不能不範圍於其中喟然之與正有當於本懷 朱子曰爲學與爲治只是一統事他日之所用不外乎今日之所存三子却分作兩截看了如治軍旅治財賦治禮樂與凡天下之事皆學者所當爲須先教自家身心得無欲清明在躬志氣如神則天下無不可爲之事矣 此篇多評弟子賢否總皆學誨中事誨亦所以爲學也

顏淵第十二

顏淵問仁章

仁者原與天地萬物相流通而禮則燦然秩敘流動充
滿於天高地下之間蓋仁不可見而可見者皆禮也只
因已私橫據禮失其位一膜之內遂成扞格故夫子語
顏淵爲仁只復禮而已矣復禮只克已而已矣禮與仁
非二物也克與復非兩功也欲盡理還兩仁即在故一
日克復而天下歸仁亦非兩候也夫子十有五志學至
不踰矩皆是夫子克已復禮之日顏子謂博我以文約

我以禮是顏子之復禮也禪家克己近似而復禮全非
祇成一自私自利耳視聽言動是著手爲仁處非禮即
已也勿視聽言動即克己也害禮的是已克己的仍是
已祇爭一克念罔念間耳請事斯語毅然身承聖門諸
賢獨顏子從乾道入故所學自別 焦漪園曰禮無體
也有已即非禮非禮勿視聽言動即爲復禮非已克而
更有禮可復也蘇子瞻云如人病眼求醫與之光明醫
曰我但有除翳藥無與明藥明如可與還應是翳由此

言之世之求明而得翳者豈少哉 或曰視聽非禮非
淫聲惡色之謂顏子只念頭纔動即覺纔覺即化不遠
而復言動亦然

仲弓問仁章

見大賓承大祭不欲勿施總是一無敢慢之心闇修有
素故不失已不忘物此合內外之道也非兩樣功夫修
已以敬一句便該盡此章不欲勿施正安人安百姓處

程子明道曰在理可使無怨於事亦難天地之大也人

猶有所憾又曰惟知自反無怨于家邦是我自家不怨
正爲仁之功孔門不怨不尤之家法家邦無怨于我亦
在其中但所重者不在此若求家邦無怨於我使之自
考是以效言也一有求家邦無怨之意成鄉愿矣

其言也詎章

其言也詎朱子說是持守得那心定後說出來正其難
其慎之意非僅事不苟也事不苟根心常存說爲之難
即是心常慎重處不作兩層 馮少墟曰學者能體會

得聖人訥言之意雖終日言亦謂之訥不然即閉口深藏亦訥之處也故曰吾與回言終日又曰予欲無言有言無言不在言上說

司馬牛問章

憂從中來懼自外至總之皆因有疚即強爲鎮定而神不恬氣先靡矣內省不疚者中庸之無惡也大學之自慊也此是聖學 或曰不憂不懼不在內省不疚之外不在內省不疚之後君子所爲無愧於心自然如此蓋

理足勝私氣足配道義居常則隨遇而安處變則順受
其正有何憂懼孟子曰行有不慊於心則餒矣只不慊
便是餒故內省不疚便是不憂不懼也

司馬牛憂章

天地間只有理數二字君子以數聽之天以理盡之已
然必盡其在已方聽其在天 或曰章惇欲殺劉安世
徙之於梅州使判官殺之判官疾馳未至梅三十里嘔
血死安世獲免可以知命矣鄒浩竄新州對友人田晝

出涕晝曰使志完隱默官京師遇寒疾五日不汗死矣
豈獨嶺海外能死人哉此又以義制命不以死生貳其
心者也此理學中要領語審乎此便可不爲死生所眩

子張問明章

浸潤膚受四字從古來葬送了多少人性命顛覆了多
少人邦家明知此輩足以蔽明而能察者少可謂明也
已矣可謂遠也已矣見明之極遠却在極近 或曰諧
愬不行其要在於窮理知人使讒說無由而進則不待

其不行而後謂之明也枉直邪正庸復有不早辨者哉
子貢問政章

下不得恃上之心上不得恃下之志國將何所恃以爲
固哉故不得已而去兵又不得已而去食而信必不可
去者蓋無信則爭民施奪稱兵犯順兵食安得足乎此
是聖門實經濟真學術 或曰勢窮獨信可仗寧無食
而死不肯信而生如唐張巡許遠以睢陽城抗強敵援
絕力盡是去兵也至羅雀掘鼠而食是去食也士卒竟

無一人叛者是終不去信也以此推之信不容輕去的
道理自見

棘子成曰章

文質原分不得子成去文存質雖可以醒末世繁文之
弊然文去而等威上下之分不辨大亂之原將起於是
子成意可維風子貢言可經世各對症下砭似不必苛
求 或曰文質原拆不開生來便合著更無可分故云
文猶質質猶文其取譬於虎豹亦正爲虎豹皮與毛原

自相附此千古文質定衡也

年饑不足章

國君事事不足事事問民到得民不聊生時將誰與君以足者念及此猶虐取其民是自戕其命脈者也 或曰兩孰與字即民爲邦本意古人徹法專從百姓起見故無不足無不足不獨府庫充實兼常變意在內有若此論直從君民一體之理看出如堯湯水旱豈能皆足而無不足之理自在尹鐸令晉陽損其戶數後襄子

奔之沈竈產蛙民無叛志亦其一端也

崇德辨惑章

中心信與義即德也主則貞固不遷徙則圓轉不滯此德之所以崇也愛惡顛倒死生橫加其于人也復何傷祇重己之迷謬耳非近裏著己之學德固難崇亦未可輕言解惑或曰崇德即君子上達意事事合天理無一毫人欲之私此心不愧不忤便自高明光大易曰地中生木升君子以順德積小以高大可想此節之義生

死非人所能爲而吾欲之如此者全從愛惡一念生出
欲生欲死是感知欲生欲死之念從愛惡出便是辨惑

景公問政章

君臣還其爲君臣父子還其爲父子而政之能事畢矣
不君不臣不父不子便有多少不盡分處此所以有粟
難食也景公善其言而不能免於禍信矣知之非艱行
之惟艱 張南軒曰爲政以彛倫爲先彛倫不敘則節
目雖繁亦無以致治矣君君臣臣父父子子彛倫所以

敘也雖堯舜之治亦不越乎此貴於盡其道而已

片言折獄章

片言能服人蓋由平時無片言之欺人也子路之果由來素矣故千乘之國不信其盟而信子路之一言 蔡虛齋曰忠信明決正是無宿諾意如踐言而不欺者忠信也急於踐而不滯者明決也但忠信明決說該得廣而無宿諾只是其中一事雖是其中一事而子路明決之全體亦因可識蓋是未曾發言而折獄之先如此也

聽訟猶人章

使民無訟不是空談大畏民志無情者不得盡其辭此
其的証視由之折獄而本末源流又有分矣 易之訟
曰君子以作事謀始蓋絕訟端於事之始訟便無由而
生

子路問政章

無倦以忠純是一個至誠無息堯舜之兢業存心勲華
垂世道不外此 新安陳氏曰居如居敬之居存諸心

立其本也行如行簡之行發于事達諸用也

君子成人章

君子常欲以有餘者及人小人每至以不足者忌物故
美者君子所有而小人所無也一成一不成各自肖其
本心小人反是句是聖人微辭見小人胸中忌刻詆毀
形容不盡但以反是二字包括言之耳鹿伯順亦云小
人作用它把美惡來顛倒一番使人既便於私情而復
得托於名理怎不去從若容易看破不見他曖昧陰險

處 馮少墟曰成人之美便是美故君子必成人之美
成人之惡便是惡故君子不成人之惡

康子問政章

正是政之根本要著民正須先自正

康子患盜章

欲即是竊要民不竊須先不欲

如殺無道章

殺字太慘失長民之本矣民性本善爲上者以善迪之

未有不趨於善者要著民善須先欲善欲字中有作用發於政事之間即德也抹他用殺之心三提子字令他躲閃不得三問都是責諸民三答都要求諸已 吳氏曰書云表正萬邦上者表也下者影也表正則影正矣政之義無切于此論語記康子問政者二章問患盜使民各一章夫子答之皆使之反躬自治而已蓋道理不越如是此外更無別法也

何如謂達章

聞與達之辨闇與的之分也質直好義與色取行違觀
察慮下與居之不疑相似也而實相反一務實一近名
務實者以誠造謙近名者以偽造欺鄉愿亂德正恐認
聞爲達端士趨者可不首嚴於此 或曰子張問達猶
是問行之意也以爲聞達之行同而不知聞達之所以
行不同夫子因辨別是非言如此躬行無愧者是達如
此求人有譽者是聞使知所適從就近裏著已處求行
耳

樊遲從遊章

未事而計得攻人以自寬不懲小忿而釀大禍此等病
古今通患聖門近裏者已實際作功夫莫先於此故善
其問令他自醒與告師意同 陳新安曰自治其惡與
自懲其忿皆崇德所當爲之事乃其目也

樊遲問仁章

仁知原是合一知自不妨於愛使枉爲直知正所以全
其愛夫子之言原已包子夏之意子夏之意却暗與聖

言相合解者言下即解不解者一疑再疑不知終能解否 胡雲峯曰知人愛人是分言知仁之用舉直錯諸枉能使枉者直是合言知仁之相爲用蓋仁包義禮知仁之中自有知知藏仁義禮知之中自有仁知仁本相爲體用故見於舉錯之際知仁又自相爲體用也

子貢問友章

忠告善道此聖門友誼也此之不能盡遽以彼不從而止終於交道有愧 或曰忠告善道必不至數而見疏

數者善道之反也不可則止俟其自悟別有轉移正所以成其忠告善道處

以文會友章

文與仁非有二也文以載仁仁不可見凡可見者皆文耳非文何以取友而取友正爲輔仁友誠重矣哉或曰二句一氣歸到輔仁蓋會友正爲輔仁地也如此說庶於文字不泛而所會之友亦斷無燕僻之患矣此篇論仁論知論崇德論君子小人論士論政論明論友

何莫非學習中事

四書近指卷九

欽定四庫全書

四書近指卷十

容城孫奇逢撰

子路第十三

子路問政章

率先勤勞意常周於民情事理之外賢者猶可自勉至
無倦則真實不容已處非自強不息不能 或曰請益
無倦非抑子路先勞外原無可益耳無倦便是無逸作

所自強不息底道理此爲要領處非止救勇躁之失而已程子云這一點意氣能得幾時須要無所喜無所厭只早平常常幹得去纔是無倦按此說看無倦二字甚確

爲季氏宰章

以天下之治付之天下之人至用天下之人亦仍付之天下之人總是持寬大尚體要我與天下俱遊於簡易之中 蘓氏曰有司既立則責有所歸然當赦其小過

則賢才可得而舉惟庸人與姦人無小過張禹胡廣李
林甫盧杞是也若小過不赦則賢者避罪不暇而此等
人出矣 范純仁宋哲宗宰相凡薦引人才必以天下
公議其人不知自純仁所舉或曰為宰相豈可不牢籠
天下士使知出于門下純仁曰但朝廷進用不失正人
何必知出于我也按此數語見純仁公爾忘私他如婁
師德薦狄仁傑入相而仁傑不知王曾言執政令恩歸
已怨將誰歸皆可為後世大臣舉賢者法更可異者漢

順帝時宦官競賣恩勢惟大長秋良賀退厚及詔舉武
猛賀獨無舉帝問故賀曰昔商鞅因景監見有識知其
不終今得臣舉者匪榮伊辱是以不敢按賀此語非獨
正義自持亦使負才抱異者審於出處之正不至有失
身之恥賀真賢矣哉

衛君待子章

衛事之不可爲也夫子固知之矣設一爲之除正名無
著手處料理國家事不從大綱大紀處整頓而掇拾微

末何關緩急由之意謂一犯其所忌則意逆情乖政將不可爲豈知大聖人旋轉之手自有機緣陽明所言未爲無見即不然亦存此一段不磨之論於千古耳豈敢苟一時之言以至於無所不苟哉 或曰看通章須想出正名前一層工夫正則必不可苟苟則不是正全在心術隱微反求個天理人情恰當處衛輒拒父總是苟且得國總是心不正根源一壞縱鋪張治具到底事事錯亂孔子先正名即拔本塞源之法不如此必不可以

爲政末節無所苟句雖連上文言字說却要隱隱根心術說心無所苟則名正而政事舉矣大學所謂誠正孟子所謂格心皆包括在裏面

樊遲學稼章

歷山莘野兩耕夫何嘗有妨大人之事但未可爲遲言也故揭禮義信以示之此是何等規模何等作用其機全在上好蓋君子之所治者甚精而所至者甚大襁負其子而至何憂無稼圃之人而煩已請學爲 朱子曰

役智力於農圃內不足以成已外不足以治人是濟甚事

誦詩三百章

誦詩讀書所以經世致用噓古人已陳之迹起今日方新之緒方是有用之學乃有誦詩三百而詘於言所謂儒生俗士不達時務者耳 或曰學必有得於心而後有得於事達者心通事變不滯於章程不膠於形迹也專對者通義理識時勢不拘君命不執成規而能專其

對應也

不令而行章

從好不從令自古民情如此故曰以身教者從以言教者訟至於訟無問令之行不行從不從此身已危乎其危矣令何足恃焉

魯衛之政章

初魯衛之國兄弟之國也今魯衛之政兄弟之政也何意當日之兄弟而遂爲今日之兄弟耶無限嘆息厚

齋王氏曰家之不齊莫甚於魯衛觀詩可見矣衛不足
言也魯自括戲之爭而桓宣皆篡兄矣自文姜之亂而
哀姜襲其跡矣自成風事季而敬嬴事襄仲矣家法不
修故曰魯衛之政兄弟也然衛多君子魯無君子斯焉
取斯風化猶媿也畏清議者亦曰何以見魯衛之士政
俗雖濁風俗不衰與漢之東都同

衛公子荆章

古今通病只是個不知足知足則簞食瓢飲而亦樂不

知足則萬鍾千駟而不免於憂子荆以衛之公族獨能
廉靜寡營謙沖自處其過人也遠矣家語季扎適衛見
公子荆而悅之與蘧瑗史鮪並稱曰衛多君子未有患
也齊豹之亂荆爲靈公驂乘豹射中荆之背公遂得免
荆之善亦不止居室一節

富之教之章

由庶而富而教是帝王聖賢厚生正德之功作君作師
之事三代而後鮮有舉此職者夫子素切於懷雖未見

諸行事而偶觸于衛聊以露其端倪此便是期月三年
的實際通章精神須在庶矣哉上想像發慨光景 漢
荀悅云人不畏死不可懼以罪人不樂生不可勸以善
故在上者先豐民財以定其志是謂養生禮教榮辱以
加君子化其情也桎梏鞭扑以加小人化其形也若教
化之廢推中人而墜于小人之域教化之行引中人而
納於君子之塗是謂章化按悅此語與孔子富教之說
相發明而悅推言其弊尤見不可不富不可不教之意

苟有用我章

夫子黜富強而專尚德化當時諸侯王莫不以爲取效太遲不知大聖人布局雖寬而提綱甚捷可也有成自審素矣 張南軒曰期月而大綱立三年而治功成然三年之所成者即其期月所立之規模也充之而已矣 善人爲邦章

殺運之興善教之衰也人以為殺是目前萬不容已之事事夫子以為去殺是古人最有體驗之言言下有低徊

慨慕之意 集註漢高惠文景黎民醇厚幾致刑措愚
謂文帝身恭儉務德行正可謂善人惠帝懦弱景帝刻
薄高帝有英雄之畧非善人之質姑取以爲百年相繼
之證故曰庶乎其近之矣

如有王者章

教化浹洽無一人不貫徹蒸變此何世界乎求之詩書
惟文武成康足當之春秋時幾見此光景 胡雲峯曰
勝殘去殺者如能去人之疾而使之不至於死者也仁

則如人元氣渾全而自無疾者也天下無一人非天理之融徹無一處非天理之流通故曰仁

苟正其身章

從政所以正人自正身始下二句足上意 或曰對康子政者正也一節爲正卿執政者言故曰帥大臣表帥也其身正不令而行一節爲君上主政者言故曰令君令臣共也此節爲家宰而同升諸公及士初試爲大夫者言故曰從政從柄政之大夫而後也責有重輕其不

可不正身以正人一也

冉子退朝章

冉子仕季氏而亦曰朝僭甚矣公朝之事曰政私家之事曰事冉求尚未聞此乎何怪乎爲之附益也 魯政逮于大夫四世矣康子與冉子謀者固政也曰有政實對也而不知其失辭也夫子嘗曰天下有道則政不在大夫故一聞其言而正其失曰其事也

一言興邦章

知爲君難者自不肯樂莫子違樂莫子違者爲不知君
難故也總之一心亦是一事定公之問亦可謂有意於
治矣使其能用夫子之言以媚已之人爲可畏三子之
徒庶乎少悛而魯其或興也與惜乎女樂之事公既欲
之既不知爲君之難桓子又助成之是正所謂言不善
而莫之違也魯之衰也獨三子之過耶

葉公問政章

政治之得失觀民情之向背而可知未有近不悅遠不

來而可稱治理者既悅且來雖說後一層而前一層工夫自在所謂以本諸身者徵諸民耳豈與驩虞招徠之術同日語哉

爲昔父宰章

爲政有許多條件許多節候數日之程必非一日可到豈容欲速事關全局力有獨注遠大之圖必不苟且自安豈容見小彼欲速見小者祇驩虞雜霸之術以速得滯以小害大此其所必然者耳數語括盡古今治體不

止砭子夏近小之病 饒雙峯曰見小與欲速相因裁
要速成便見得目前小小利便處所以急要收效若是
胸中有遠大規模自然是急不得

有直躬者章

以證父爲直天理人情安在夫子易一隱字而曰父爲
子子爲父則天性至情合當如是直心循理直躬循迹
全在知學 或曰相隱內寓義方之訓幾諫之道在須
想見積誠感悟父子一體闕切不能自己的意思此便

是原來直遂底本性故曰直在其中非尚指容隱爲直也

樊遲問仁章

只在平居應事接人之間操存此心所謂隨時隨處體認天理是也至于講到不可棄只是無須臾間斷程子謂是徹上徹下語若曰小則樊遲可用大則堯舜不過子貢問士章

說個無恥人實難堪說個有恥誰實無愧不辱已不辱

君尚矣次之稱孝稱弟又次之必信必果皆可爲士獨不肯輕假於從政之斗筭其品士亦嚴矣哉子貢起初意在從政到底討得一噫總之不敢謂其有恥有恥在學者內省不疚非論說可盡 張氏曰小人對大人說硜硜是拘泥見不到大處言行內却自有孝弟在其人亦必非無恥須說得有分寸

不得中行章

進取之人與不爲之人皆與俗不諧不爲世所喜然以

孔子道眼觀之絕盡世間假冒之習接中行之統者必
是此人 荆川唐氏曰謹厚與狷相似而非狷狷者必
乎已謹厚者役于物今人多以謹厚爲狷亦學問不明
之過也

南人有言章

恒德一喪無事不爲靜言思之其羞實甚善夫一言依
然思見有恒之意

和而不同章

和主循理自無黨同同主暱情自之和衷然非道眼莫辨 勉齋黃氏曰和之與同公私而已公則視人猶已何不和之有惟理是視何同之有私則喜狎昵所以常同樂忌刻所以不和

鄉人皆好章

真正人品原無皆好皆惡之理善者好而不善者惡既足取重於君子又不苟同於小人此夫子觀人之法 麻城梅氏曰到底是要子貢自己著眼勿徇人見不然

善不善先憑誰分別出來

易事難說章

君子從天下起見故所重在事小人從一己起見故所重在悅重在事而悅自難天下人相率而爲事此何如世道乎重在悅而事自難天下人相率而爲悅此又何如世道乎 慶源輔氏曰君子持己之道甚嚴而待人之心甚恕小人治己之心甚寬而責人之意甚刻君子說人之順理小人說人之順己君子貴重人才隨材器

而使之而天下無不可用之人小人輕視人才故求全責備而卒無可用之人

泰而不驕章

泰者內省不疚自然心廣而體胖驕則志盈氣勝與泰正相反然亦有不驕而未之泰者能制其私而涵養未到未免有跼蹐之意

剛毅木訥章

四者俱是天性用事不內屈不外馳故近仁正須實下

求仁功夫方與仁合蓋欲學者不可負此近仁之質

切切惻惻章

切切就情意懇到言惻惻就教告詳勉言怡怡就顏色和氣可掬處言士之涵養在平日隨朋友兄弟而徵其篤摯中和之意正是鑄由之行行處 或曰三者固不要混施亦不可拘泥朋友豈無怡怡之時兄弟豈無切惻之事大凡義屬者切惻之意多恩屬者怡怡之意多斯可謂之士矣

善人教民章

周禮教士七年謂之小成此云七年者亦教民有成之時也即戎謂養元氣者即可以壯神氣

以不教民章

戰固子之所慎而戰必克有勇知方聖門師弟竊以自許獨恃有此教不敢輕棄民耳棄之二字可爲痛哭此篇論士論仁學之首事而中行狂狷善人有恒與我共事此學者也共事此學故嚴君子小人之辨至期月

三年百年必世加富加教好禮好義用世之懷殷矣天德王道一以貫之

憲問第十四

邦有道穀章

此夫子一字之誅也不論有道無道貪祿不休是必有苟且之術故君子羞其用心恥之於人大矣哉

克伐怨欲章

世皆行克伐怨欲者也故不行爲難然特乘流爲堤耳

制之也而非化之也四者不行於外矣而仁豈遂行於心乎 或問四者以爲不知其仁及顏子問仁却告之克已何也顧涇陽曰已是克伐怨欲之根克伐怨欲是已之枝葉從枝葉上檢點方且西滅東起何時是了從根上斬斷一切沾染不得矣兩下相去正是天淵

士而懷居章

士須有一段超然無累之意而曰懷居辱士實甚朱子云自古無閉門獨坐的聖賢

危言危行章

行以持身終無可變之理言以應世自有當孫之時言
孫者正所以善用其危行者也宋新法之行程明道謂
吾黨激成之過正病在不能言孫耳狄仁傑諫武氏立
三思裴度諫敬宗幸東都皆從容不迫事其有濟

德必有言章

天地間全者足以包其偏而偏者必不能舉其全故德
與言仁與勇所以必有不必有此專恐世人假德冒仁

者說 或問仁與德何別曰隨所得淺深皆可以爲德而仁則德之全也

禹稷躬稼章

福善禍淫固屬天道然其所不應者亦多矣這偶借古人之淑慝以著己心之賞罰真可以發潛德之光維失德之運得意之言不煩多辭

君子不仁章

中心安焉之謂仁故君子有不仁之時小人無能仁之

理總見仁之難盡也

愛能勿勞章

愛則不能不勞勞處正是愛忠則不能不誨誨處正是忠此是慈父盡臣之最篤摯處

裨謔草創章

四子各盡所長共濟國事然實子產能用三子叔向云子產有辭諸侯賴之此之謂也歷定獻襄公凡五十年得免兵禍

或問子產章

彼哉不足言人子產管仲亦無容置優劣三子在當時
氣焰赫然各有可稱夫子都以一字概其生平這纔是
大手眼

貧而無怨章

非孔顏難言不怨千古人都著一貧字考倒難易云者
以德性學問之淺深論非謂人情事勢之苦樂也

爲趙魏老章

公綽之不欲夫子意中有此人故史記世家云孔子之所嚴事魯則公綽周則老子斯言非議公綽意在用公綽者

子路問成章

聖人陶鑄人羣其融液處全在文之以禮樂蓋春秋猶有周之餘教皆以禮樂相先故若冉求臧武四人知廉勇藝各有偏倚駁雜處到得文以禮樂的時候亦可以爲成人若字貫下數句亦字緊承若字非拘拘取其

長而兼之合之也思義授命久要不忘亦因今之士習
全然少此一段風骨故曰亦可以爲成人不暇論涵養
而亟取人之根基蓋爲有基方可言受采耳 馮少墟
曰見利思義必平日講一介不苟之學見危授命必平
日講朝聞夕死之學不然利至然後斟酌道義危至然
後商量生死則不及矣

公叔文子章

不言不笑不取怪癖不情難令人信時言樂笑義取從

容中道更令人疑信乎豈其然乎辭意婉曲就中可想
見文子之人 饒雙峯曰廉靜是氣質好時樂義是義
理自學問中發出底賈所稱非仁熟義精者不能

以防求後章

以防二字是書法作春秋手段 尹和靖曰據邑以請
立非要君而何不知義者將以武仲之存先祀爲賢故
夫子正之

晉文公誦章

權以濟事曰譎晉文取威定霸多用此術桓公初定霸業緣人心尚思王者故多以仁義二字感動他桓非文之列也因文而有桓之思存疑云譎正俱就行事言若心術皆不得爲正

殺公子糾章

子路責仲不死夫子不論其死但舉九合之功以稱其仁明不死之無害程子云桓公兄而子糾弟襄公死則桓公當立此以春秋知之金仁山云桓公自莒先入

靖國人葬襄公正位君齊矣糾何爲者耶而管召方輔
之用師伐國是以亡公子而抗齊君耳前無正君討賊
之義後有抗君爭國之非則是仲之輔糾爲不義罪已
可殺桓公不殺而用之則安得而讎桓乎此夫子所以
不責其死也

管仲非仁章

子貢責仲又相夫子亦不論其相之是與否但舉一匡
之功以仁其賜見仲爲天下所不可少之人不可徒死

也看到關係處真覺匹夫匹婦之諒爲小 張南軒曰
只爲子路疑其未仁子貢疑其非仁故舉其功以告之
若二子問管仲仁乎則所以告之者異矣

公叔文子章

春秋之時卿大夫各私其才以藩其身文子能出其事
我者與之共事君絕無嫌忌心事何等光明真無愧於
文之謚耳

子言衛靈章

三子者皆是短中取長用當其才即無道而不喪才之
闕於用也亦重矣哉

其言不怍章

不怍之心便是不爲之心到爲時始知其難後矣

陳恒弑君章

夫子初告時冀魯君憤發以成討賊之事此天地之大
義也誠爲義亦必用力而後能濟則力皆義耳後世儒
者但言義便不要力但言力便說非義豈知聖人以義

用其力以力成其義乎告夫三子只此一言聖人亦無如之何矣大夫之後不敢不告一自言一對三子言無限感憤 或曰只陳恒弑其君五字大義凜然春秋之不及書者書矣雖不及書之春秋二百四十年獲麟之後特筆于論語二十篇所謂以天子之事懼天下萬世之臣子者自此畢矣甚矣沐浴而朝之義大也

勿欺而犯章

事君之道雖曰有犯無隱然不能取上之信未免以爲

謗已故須勿欺而後可犯勿欺者學問經濟兼至非區區樸忠謂之能勿欺也

君子上達章

上下無盡境君子小人皆非一日而至君子日長進一日初亦爲難而試勉之久之而所勉者安以爲常小人日沉淪一日初亦疑而嘗試之久而所嘗者恬不爲怪兩人各有樂處故各不能自己要之只從一念上起分別頭路只在戒懼慎獨

古之學者章

爲己者求慊於己即有時爲人總是爲己爲人者求知於人即有時爲己總是爲人程註成物喪己宜味

伯玉使人章

欲寡其過而未能何其言之婉而盡也夫子嘗思學易寡過其言正合使乎寧直傳主人之心也 按伯玉居衛治亂殊遭邪正雜進求寡過原不易使者實見得他心中負疚不敢即安之意非故爲卑約之辭也 鄱陽

朱氏曰此章稱美下僚能知君子之心則此使亦非僕
隸之謂觀子華為夫子使齊可見

思不出位章

位外之思明知無益姑行意其中以寄樂究遂不能自
主而放蕩無所歸攝有位以止之庶不以侵成曠而天
下之理得不出是用力處

恥言過行章

說著恥只是有餘說著過只是不足此可想見君子之

心

君子道者章

君子是合仁知勇爲一身者也蓋三者非可塗飾假借以欺人必實試之憂懼惑的境界却能不憂不懼不惑方露出仁知勇本體方見三者之難自道言夫子道君子適以自道耳子貢智足以知聖人

子貢方人章

真實學者自治不暇奚暇及人多一分及人之意便疎

一分自治之功于子于賜也自不肯輕假

不患不知章

我不能而人何知用患者殊不可解故屢言以醒之

不億不信章

逆詐億不信只是個不誠誠矣而未有不明者不逆億而先覺斯爲誠明之君子 馮氏曰逆億如人在室外而料室中之虛實先覺如明鏡照物而物無遁形此非格物致知洞然明知者不能也

微生畝謂章

避世之人與用世之人自是冰炭不同故畝以子爲佞
子以畝爲固亦各言其志也矣然佞則非敢而固則疾
之仍欲轉無用耳

驥不稱力章

世人稱驥在力夫子獨曰在德意中言外隱躍可思
饒氏曰驥者良馬之稱馬中之驥如人中之君子驥非
無力然其所以得驥之名者以德不以力君子非無才

然其所以得君子之名者以德不以才

以德報怨章

君子重德施所以存厚也然非爲以德而施之怨已者如以施之于怨已當何以施之於德已乎著以意見違其天則固知或人之言不可訓也然聖人終不使人忘怨而沒其報復之名者亦以見君父之讐言有不得不報者而伸夫忠臣孝子之心耳

莫我知也章

夫子一生只是下學上達在下學內誰其知之不怨不
尤無所愠於不知也不以不知爲可愠故不以人知爲
可樂此處修証直與天命流行門下士各具一體誰非
知音然未見全體難言知我知我其天自己寫照 姚
江王子曰夫耳可得聞目可得見口可得言心可得思
皆下學也目不可得見耳不可得聞口不可得言心不
可得思即上達也如木之栽培灌溉爲下學至於日夜
所息條達暢茂乃是上達人安得預其力哉故凡可用

功可告語者皆下學上達只在下學裏

公伯寮愬章

聖人不能免人之謗已也但其所以處謗之道自有超然於利害得失之外者此是不怨天不尤人實地孔子爲政於魯墮季氏私邑者子路也寮之愬即假以沮孔子故子不爲子路計而直曰道之興廢命也

賢者避世章

舉世知趨誰解此辟者四辟者所遇不同皆有冥鴻高

蹈之意 黃勉齋曰出處之義自非一端隨所遇之時而酌所處之宜可也衛靈公顧蜚雁則辟色矣問陳則辟言矣豈夫子於此爲劣乎此所以不可優劣言也

作者七人章

作至七人世道可知辭與上下相聯 或曰作者一句本在逸民章身中清廢中權之下我則異於是之上既明是子曰總斷之文又合七人現在之數聖人書法當如此

宿於石門章

不可而爲不忍忘天下也道著聖人心事

擊磬於衛章

聞磬聲而知其有心荷蕢亦非常人也但蕢之意在世
莫我知便當已矣初亦非全然無意子之意在果於忘
世亦何難乎到底仍是有心

書云高宗章

喪必三年自天子達於庶人古今通義不意有所謂以

日易月者聖人論古人總是維名教

則民易使章

民之難使爲其亂使也好禮之君必以禮使民故民應之惟謹

修己以敬章

只一修己以敬其事便了明德在民上明修己在人與百姓上修人與百姓有未安便是己之昏昧放逸處堯舜猶病病非病人安之未盡實病已敬之未至耳


原壤夷俟章

是爲賊者謂生平無善可稱盜此形骸有害於世鄭
舜舉曰聖人之接物各稱其情惡之而遜其辭外之也
遇陽貨是也惡之而斥其罪親之也遇原壤是也

闕黨童子章

洒掃應對進退之事所以折其傲與惰之念也童子居
位並行欲速成病正犯此將命之意其在斯乎 此篇
論恥論仁論士論言行論貧富論患論思論諉論德

怨論忠孝亂賊評古今人成敗得失以及隱士逸民先
覺故人童子無一非學中事無一非學中人下學上達
知我其天乃孔聖人歸宿處



四書近指卷十